

L'Estonia e sia minoritad russofona

DA GUIU SOBIELA-CAANITZ

■ **L'Estonia (45 227 km², 1 315 000 olmas) è in dals stadis ils pli pitschens da l'Uniun europeica.** In cunfin da 294 km al separa da la Russia, il stadi il pli vast dal mund; ina part da lez cunfin va tras il Lai Peipus (3555 km²). L'Estonia cumiglia millis inslas, grondas e pitschnas, en il Mar baltic. La politologa estona *Anna Tiido* ha gist publictà in essai davart ses pajais en ina revista sociologica svizra*. I suonda ina quintessenza en lingua rumantscha.

Da l'occupaziun a l'indipendenza

«Ils Russ etnics fan ora var 27 % da la populaziun estona. Bliers èn cristians ortodox (...) Ins ha restaurà il stadi eston l'onn 1991 suenter in'occupaziun sovietica da passa 50 onns (...) Il 1934 eran mo 8 % da la populaziun estona russofons, il 1989 var 30 % (...) La politica sovietica encuraschava numnadamain la gliעד a dischlocar; quai rinforzava la prevalenza dal russ sco lingua cuminaivla uffizialmain favurizada. L'Estonia restaurada privilegiava tgi che derivava da burgaisas e burgais estons gia avant l'occupaziun (...) Pir enturn 1995 ha il stadi chapì ch'ins stueva integrar la populaziun immigrada, e quai cunzunt grazia al linguatg eston (...) Var ina terza part dals russofons è burgaisa estona, ina terza part burgaisa russa, tschels èn senza naziunalitad determinada (...) La questiuon dals russofons è disputaivla tranter Russia ed Estonia dapi che questa è puspè independenta (...) Organisaziuns internaziunals controlleschan regularmain la situaziun e constateschan adina ch'ils dretgs da la populaziun d'otra lingua èn duida-main respectads (...). Ins sa disputava davart las minoritads russas a l'exteriur gia sut la presidenza da Boris Jelzin (1931–2007) (...) La politica dal 'mund russ'

punctuescha la singularitad da la cultura russa: Tut ils umans colliads da lezza cultura stoppian esser unids sut in tetg cuminaivel» (pp. 19–20). La lingua estona, a sid dal Golf da Finlanda, è stretg parenta cun la finlandaisa e parenta dalunsch cun l'ungarais.

Il schuldà sovietic da bronz

«Ina da las fasas las pli problematicas da las relaziuns tranter Estonia e Russia è stada l'uscheditga crisa dal schuldà da bronz (2007), numnadamain il monument a la schuldada sovietica unfrenda da l'uscheditga 'Gronda Guerra patriotica'. Ils russofons levàn depositar flurs avant lez monument, e quai cunzunt per far endament la victoria sovietica dals 9 da matg 1945. Per ils bliers Estons na muntava quai dentant nagina liberaziun, mabain il return da l'occupaziun sovietica. Gruppas extremistas han dentant cumenzà a sa rimnar sper lez simbol cuntravers. La regenza estona ha lura decis da spustar il monument sin il santeri militar.

Quai ha chaschunà protests da var milli umans (...) e sblundregiadas da butias en il center da la chapitala (...) A Moscau ha gliעד dal moviment giuvenil 'Naschi' circumdà l'ambassada estona e mulestà l'ambassadura (...) La societad estona ha lura chapì che l'integraziun na fascheva betg effect: Ins stueva plaschair dapli als russofons (...) e dar en russ 40 da las 100 uras emnilas d'instrucziun gimnasiala» (p. 20). Il «Calendario Atlante De Agostini 2019» resumescha: «La tensiuon persista cun la Russia limitrofa; l'Estonia insista per vegnir sustegnida dals alliads da l'OTAN e da l'UE» (p. 551, chavazzin «Estonia»).

***Anna Tiido: «Die russische Minderheit in den estnisch-russischen Beziehungen» en: Institut G2W. Ökumenisches Forum für Glauben, Religion und Gesellschaft in Ost und West (ed.), 7-8/2019, Turitg, ISSN 2235-2465, pp. 19-21.**